

四庫全書

集部

欽定四庫全書

集部

文苑英華卷九百

三十五
三十二

詳校官庶吉士臣龍廷槐

助教臣常循覆勛

總校官進士臣朱鈺

校對官助教臣蔡鎮

謄錄監生臣鄧洪繼

謄錄監生臣戴天民

欽定四庫全書

文苑英華卷九百三十

宋 李昉等 編

職官三十八

縣令二
丞尉附

蜀州青城縣令達奚思敬碑一首

并州太原縣令路太一碑一首

瀛州河間縣丞崔漪碑一首

故洛陽尉贈朝散大夫馬府君碑一首

蜀州青城縣令達奚君神道碑 員半千

粵以煌煌丹草非濟物之用而冊府書之粲粲白石豈
益國之器而史官紀之况乃六義基身四維成性風調
百里雨潤一方動植俟之以滋榮人倫資之以和樂使
仰之者若日月敬之者若神明畏之者若雷霆愛之者
若父母而可謂盛德湮滅無聞於後哉君諱思敬字安
儼河南洛陽人也若乃二星分北掩龍沙以居宗六月
圖南擅鵬溟以為大實一作寶非天命昌意啟我幽都帝一作
宗封始均天一作代雄弱水積六十七葉凡九十九姓豫

鄰之代分為諸國兄弟七人各統一部天倫之盛達奚
居上高祖遷洛有志諸華思變其風多改舊族故達奚
於後使姓奚焉周氏沿革復姓達奚氏矣自茲厥後可
畧而言曾祖諱武字文朝為玉壁大將軍東道大行臺
十二將軍同華二州刺史雍州牧太師太傅太保鄭國
公諡曰桓于時齊氏跋扈於并鄴有遷鼎之宏志周人
經綸於關輔當運斗之有功一作兩界交爭三軍遽及
攻守之術應變若神戰勝之方倉卒闕妙由是天臺八

柱分作宰牧之尊帝座三台命為師保之貴大父獻太
子左千牛尚輦直長時高臺漸傾曲池向平金玉滿堂
化為道德瑚璉入廟直接明神早露先霜不登爵秩昭
考諱孝茂皇朝滑州司兵參軍易州易縣令却負盧龍
之塞漢疑作陽之突騎成風前款飛弧之門邯鄲之俠
客交亂君水火相濟文武兼施巨闕之前訟端自喪常
山之下符采生輝君則驪泉夜光虹巖朝彩籠雲罩月
之穎必由於尺蘖遵江及海之浪亦經於寸源叙用有

階莫或不踐總章中以仁勇校尉守左衛率府翊衛秩滿
以文藝優長簡入吏部後解褐承奉郎行幽州新平縣
尉雖時以為美心非所好故咫尺之間無因騁馬也秩
滿停家積年授徵展駿足未超一作起前路辭滿之後遂

以邱壑為心垂拱之初天命已改則天皇帝攝行君政
心遍區中採芳草於蘭澤省山苗於松澗迺留神陸沉
隨方擢善二年授高陵縣主簿以舊德起也屬西蕃不
靜北方多難被奏充牙道行軍司兵事不獲以遂即戎

馬君設策請拔碎葉疎勒于闐安西四鎮皆知所計謀
存於我功在諸人授之加朝議郎行蒲州司法參軍事
既表裏山河股肱要壤用之惟器選擬為難君盤根錯
節等庖人之遊刃發伏摘奸同郢匠之揮斲紫宸迴顧
赤縣瞻風長安二年調補乾封丞矣疑蜀岷山井絡之
分帝以會昌梁州輿鬼之躔人為繁雜相如之宅無復
德音文翁之堂空餘陳跡人不見德年代以深舊稱難
理斯焉是賴四年授蜀州青城縣令以人望遷之君下

車布政推誠待物舉義壯忠貶惡除盜或謂曰不迺濶
乎君謂之曰前史有之舉有義者所以救貪汙無恥也
舉有行者所以救廢亂失道也舉廉讓者所以救分爭
也舉遜順者所以救橫逆也舉質朴者所以救離弊也
舉惇厚者所以救賤賊也今若此皆有吾何已焉吾薄
劣實荷榮獎既承澆競之餘復當巧詐之盛若不憲章
古道祖述前修貞彼傾轍不遷其軌必也政成何望朞
月遂為明科例自形諸已以上善而包荒用中而禁暴

曾不晦朔闔境肅清剽狡潛散謠頌攸遠聲震錦城雙

流為之變色德充

集作重

錦里八郡以之易心屬七廟靈

長三光復道則天推位應天嚮明以加朝散大夫承國

慶也將謂魯恭才識坐入司空卓茂賢明行昇大傳豈

馳波易遠過隙難留遽沉連石之暉遂往懸碑之路神

龍二年八月二十七日終於長安之義寧坊私第也惟

春秋五十有九惟君少懷忠義以信分為冠冕長好急

難以然諾為爵邑天姿孝友率性冲和虞仲寧學高德

博而蒸嘗無主劉休涓帝室王門而禋祀不繼太夫人隴西李氏將軍該之女有行業每以此歎之君夫人義興縣君蔣氏則尚藥奉御豈之曾孫太子門郎義安之女琴瑟友之同詠河洲之什蛟龍合矣共赴延平之津景龍二年十月十六日終於義寧里春秋五十有一以景龍三年三月十日合塋于咸陽之畢陌原禮也有第二女道光柔順德備幽閒雖裁柳絮之篇未獻椒花之頌適太原郭氏左衛武亭府別將長上如玉之妻墻宇

端肅風神爽邁溫良日用忠孝生知束髮祈榮彈冠入
仕敢當仁於潘掾荷昔眷於戴侯爰託青烏方榮白鶴
南瞻渭水庶見儀天之橋北望荆山長標鎮地之固其
詞曰

龍司北溟鵬翻南海地鬱靈氣天降神宰奄有諸華遂
荒章亥抑推高祖正朔斯在兄弟之國七族攸昌親賢
胙土四姓斯光奚于陸穆衣冠紀綱西魏將末北齊竊
號太祖經綸玉璧是搞匪禁小賊用虞大盜累加垂疑
作

重秩每贈優勞守禦功多鄭國是報昏明遞運陵谷成
災直長垂翼有美且偲青松藹藹白雲皚皚施於易縣
尉有楚才一作惟楚有才欽若惟君歷游華渚整翮理翰嘯倚
命侶風光融融靈青濟濟道以濟俗德以禦侮龍飛中
興明鸞上騰五方星聚六合雲蒸朝興斯炳大夫如陵
翼搏風而上征倚天衢而元亨風叩京兆之郡日薄長
安之域白鶴崇隴青烏相瑩琬琰斯勒存沒為榮

并州太原縣令路公神道碑 獨孤良弼

夫作德儲祉垂裕錫羨玄運之符也以爵聚貴顯親昭
孝國令之勸也然則道先於物者靈徵速功備於人者
恩典異參厥命數考其慶端至哉太原茂業斯在矣公
諱太一陽平臨青人也其先帝譽高辛氏孫曰玄元有
功於唐堯封路中侯建德賜氏公即其後襲興圖紀才
不虛世迨於隋也曾祖襄位至上儀同三司大長秋令
文皇之建極大父文昇仕至左光祿大夫秦州刺史中
宗之紹復烈考元哲官至并州榆次縣令惇忠淑亮異

代同節公淵凝有志度合尋表心順性命體形格訓至
道可憐疑浮運可端造融理極得天地之全者也始年
八歲丁尊夫人艱自然崩毀異日不食既孤無疑睦幼
弟溫慈誘最息更氣時務於勸誡者每推於教本舉以
誨人年十五讀老氏春秋精用所得不為虛學以先蔭
補太廟齊郎歷衛益齊三州司功參軍思其官會其要
雖決恒務有弘大猷所去之邦服其理尋擢授并州太
原縣令故相國河東公張嘉貞時典此郡以公諫納今

古風韻瓌朗嘗密謂所親曰雅通不隕今復見於斯人
由是有要託始不隔公禮之分矣其實為邑之政潔其
性源異氣齊和土壤可信出處語默無非教焉及秩滿
送歸之日老幼畢至瞻望嗟涕如去其親嗚呼運及世
期靈歸化本春秋五十七於歸途逆旅溝疾而終時開
元十三年八月十三日也夫人滎陽鄭氏始州臨津縣
令方喬之女禮部侍郎溫琦之妹清顯喬考明閨訓經
理于內上則是宣故得叶議純賢誕昭後慶後公十載

而歿以開元二十三年合祔於京兆府萬年縣少陵原
從先塋禮也有子四人長曰兼之撫州司法參軍次曰
梁客蘇州海鹽縣令次曰羽客鄭州別駕咸該蘊器藝
殂命下位季子兵部尚書冀國公贈尚書右僕射嗣恭
啟應前休挺傑弘表苞合文武為朝碩臣城朔方清嶺
表乾綱立西北之柱坤位正東南之極夙敷惠術實德
於人六專尚書再仗麾鉞於是建國命爵崇廟饗靈寶
應初始贈公同州刺史夫人滎陽郡太夫人今聖踐祚

遷贈左散騎常侍幽祿之恩照融上徹貴寵之位歷乎
兩朝弘密之行光宣二詔且夫體仁居貞舍德自保大
道之宗也福流來胤克昌大業積善之應也貂冠具服
位光近列揚名之義也邊豆有序饗獻以時罔極之尊
也備茲懿典其可已焉建中三年夏五月孝孫前秘書
省著作郎應泊令弟懷州刺史恕前秘書省校書郎憑
天釁崩心血哀過性楚瘵匍匐旌樹先塋式遵無念用
彰不朽以良弼冀公墓府之舊見託書詞敢存實錄之

紀以成尊祖之業其詞曰

於祖太原貞表峩峩含為淵鑑發為中和大道有本至
聖匪磨雖求其約竟獲其多齟歲執喪自然知毀友慈
幼弟已外之已作則三語為天百里雅器虛融時髦所
為名全上德壽闕下察後裔斯顯天監孔昭湛恩被壤
宜運登朝一命五馬再榮八貂東南之原歷世封交疑
重岡轉伏對闕蒼聳山色靡移松陰不動烈祖之碑孝
孫所奉

瀛州河間縣丞崔君神道碑 張說

蛟龍蟠乎沼無雲雨而不翔君子志乎道無運命而不彰然則變化者是神靈之末富貴者非德行之本守其真樂其分不其至矣世有人焉君諱漪字某博陵安平人在唐為姜姓炎帝之孫也在周為崔氏齊侯之胤也遙源長發洪河之水接於天層盤列秀太行之山拒於海東觀所以美其文宗北州所以貴其清族魏冀州刺史簡公諱纂君之高祖也齊散騎常侍諱缺君之曾祖也

隋大理少卿諱世立君之大父也故祁陽令諱抗君之
皇考也承百代之隆慶總五德之清淳孝友忠肅宣慈
恭儉好古博雅隣幾亞聖盈而若虛漠而無象非夫入
周公之廟升孔子之堂則憲章禮樂鮮得其門而覩矣
弱冠以門曹入國學舉進士母弟汲以明經同年擢第
大理卿張公文瓘人倫之表也目君曰昔兩劉並舉以
為騁二龍焉今兩崔齊飛可為儀雙鳳矣縉紳景慕憧
憧往來徙宅就居投刺成市若衆流之赴壑也及親而

往盤桓利貞解褐澤州晉城尉降為光州安樂尉換蘄
州黃梅縣尉轉河間丞凡更三尉佐四邑體公綽之不
欲勵伯夷之高操臨事以簡御人以寬雖為小政必有
可觀故八使巡風再薦清白河上遺老江濱舊使吟詠
餘聲祖述前事人到於今稱之若夫碧樹煙靄於江潭
紅荷藻耀於澤畔寶貝煙光於空浦美玉明潤於斷崖
不為金璫璫作與瑤輦之飾前殿後池之玩誠自得焉必
將有賞心之所歎也况乎殿邦光國之寶樽俎柱石之

器道為帝王師言為天下利已而稅遠駕於窮轍頓高才
於下位亦無惜焉固將有知音之所歎也垂拱元年奉使
上都遘疾終於時邕里之旅館享年六十有二夫人河東
裴氏湖州治中懷儉之孫滁州司馬昉之女也稟訓華室
作合高門嗣徽先姑克和弟婦德容之盛圖傳罕有喪親
過毀薨華朝落儀鳳中卒於鄭春秋二十有八長安三年
春二月合葬於金谷鄉邱山之陽禮也北據高岡連隴南
面大道禁臨上國皇州川原指掌仙門宰樹碑闕相望玄

靈嘉之是安

集無此二字

是宅嗣子曰用景龍中爵安平縣子

職兵部侍郎夙遭閔凶不承誨誘慎終追遠克家用譽蒙

聖主投奇賞異絕等超倫三顧赤墀之下三舉青雲之上

祿廩所資吉蠲致美實先

集作光非

人宥十世降百

集無百字

祥之

所及也永惟官不達者身不登乎明堂行不夸者名不書乎史冊則韜光隱隱之緒俾後代將何述焉夫銘景鐘稱茂代彼大夫之事篆豐石揚令名此孝子之志詞曰

維嶽建國厥生炎帝維師尚父諒彼武王古人言曰必

齊之姜齊之丁公後有崔子因邑命族世濟其美黃鵠

倚歌雕龍擅史倬哉嗣武舍章挺生以養蒙正用晦而

明混之不濁人莫能名學以崇道文以慰士集作志垂其

雲翼坦然卑位祿逮吾親榮非我仕於皇集作皇皇上帝建

官惟賢有人在下胡寧捨旃孰云輔德曾不永年展矣

邦媛宜其家室友如樂諧皎如月出重壤既兆終天偕

畢北陵墳邱松檟千秋金碑石樓祇令人愁東都城郭

通同集作淵纏絡飛橋連閣金管迭送人世之轉然兮山

川之宛然兮德音之闕然兮

故洛陽尉贈朝散大夫馬府君神道碑

前人

君諱某字某扶風人也其先伯益贊禹中衍御殷

集作商非

在周曰嬴在晉曰趙上卿以人歸政將軍以馬服為姓
緝熙乎平理重合焜燿乎伏波中水我高祖汾州刺史
諱歸歡我大父鷹揚郎將諱士幹嚴考獲嘉令諱果濟
美惟舊宜德於君君幼而瑰奇長有規操樂道稽古升

堂覩與伯父匡武撫之曰亢宗保家吾有望爾悉以先
人家牒圖傳付之入太學舉明經補巴西尉內憂去職
君四歲而孤重集於蓼因心孺慕名教同傷歸次葭萌
江隘毀道攀轎號慟濤為之却蛋人哀之葺棧而濟釋
服調襄陽尉主進魚家絕鱻食州將魯王俾盤二白集
百魚時其亡也遺之夫人以辭君還拜受使復王曰非
唯是夫又亦賢婦吾嘗其一得其二善焉長史盧幼孫
悅是獎也舉君清幹有聞授清城尉未往且有後命為

河西營田判官物土檣人藁谷洋羨皇揆其懋考績登
馬程務挺之軍靈夏也咨君運籌乘遞入幕獲虜數百
欲勦罄之君諫曰王者之師將德是以討叛惟武攜遠
在寬搏牛之畜不可破虱未擒伏念何逞纍因止師歸
策勲上柱國改溫縣尉丞永淳阻饑廣提中外絕甘分
少約已周人既喪好速室無嬖御夫人張氏詹事丞師
寂之女也敬事皇姑能佐君子娠有胎教宗如樂諧前
誌之美多所闕載絳都夫人王氏則天聖后姑之女子

而夫人之母也嘗曰婦則女訓吾女有焉享年不永玄
髮徂落先時君之伯姊婦宗夫人推居廨寢事之而躬
處下室及亡設几筵於正寢惟明靈以女公之故憑巫
通夢屢寢為辭舉家懇放久而後定嘻生則盡禮死而
知讓殆其神不昧乎温秩滿轉洛陽尉當周之興也版
都社澤郊廟禮紛嶽僕明堂京穀役重日不暇給又勅
君專摠徒匠凡三百有餘旬蘊勞成疾聃憂損壽永昌
元年孟夏辛卯卒官春秋五十有七帝用悼之贈朝散

大夫旌淑紀庸禮焉龜玉在山泉而為國寶以其靈與
瑞君子居下位而上達以其名與義夫是之寵有由也

哉葭萌之戚昭其孝也陽揚

集作

侯息浪異類胥感襄陽

之饋識其潔也德形於外聲聞於外塞垣之黨植其仁
也衆倖賴全將不為暴重務之役底其勤也沒而益榮
朝不棄力有一於此猶為令德况備舉乎豈其身將施
其後厥子構據擇皆國之良也為有後之其在是乎徵
構職太子僕景龍初宰長安也永惟考襲朱芾已佩葱

珩母氏早逝而榮不及乃讓賜階乞封先妣天子憐之

制贈夫人清河縣太君人謂長安能報恩矣詩云欲報

之德昊天罔極此之謂也馬氏之墓世在扶風清河之

喪也卜宅於洛陽北

此集無

却南

此集無

麓後君捐館因窆

其所夫人穴於兆之甲大夫窆於域之庚今龍集戊申

將返塋故國君執友禮部侍郎嚴善思諭之曰夫子之

逝一終八辰精氣其存親壤石矣吾嘗相二土

集作上從

新其愈乎且不戀本達不合塋古神尚休無咎變有夢

先君者與其言叶於是祇率嘉話即安成規堙雙墳溝
四塹傍建祠宇前勒豐碑茫茫天地永懷長畢誰居後
之人匪唯是四時蒸薦之事所以觀百代祖宗之烈其
詞曰

昂昂大夫有邈其致洽聞膚敏賙窮錫類行實迴川清
能改位佐邑惟五安人則四多稼穰邇昌言扈帥比義
后稷勤官沒地戲欵天朝毳衣以禭我有令德追啟清
河宜家族搢主祭神和親戚光貴劔蓋金歌相從先後

樂此山河

文苑英華卷九百三十

欽定四庫全書

文苑英華卷九百三十一 宋 李昉等 編

宦官上

內侍高延福碑一首

內給事郎諫議大夫韋公碑一首

內侍陳盛忠碑一首 內侍省孫常楷碑一首

內侍省內侍焦希望碑一首

內侍高君神道碑 張說

孝足動天義堪變地河中見三州之姓炳彼精誠南亭
聞再逢之母彰茲竒事不有陰德曠代誰鄰內侍高延
福者將軍力士之茲父也粵自西雲干呂東明銜璧以
亡王之族處巷伯之官而將軍本係馮亭代家南越未
知父母來奉宮闈老而無子曰悲幼而失親曰苦調之
悲者笙磬異器而同音貌之苦者秦越別狀而共色從
此斷金合要投漆相授承順無違日嚴生乎本性仁慈
匪飾天屬由乎自我父子之名既定姓氏之日遂

集作
四

移大將軍之家去鄭而取衛平原侯之室變國而從甄

亦猶是也既而內侍以鴻漸登朝苒弱

集作弱

朱紱將軍

以龍樓得主艷耀金章其訓子也溫室之樹無言車中之馬數對其事親也三牲有養志之樂百行無匪疾之憂至矣哉高氏之子也以思親之願而展親以欲報之誠而報德神明翕而哀懇荒裔竦而慕義乃有傍求聖善提挈炎州二紀積離萬里遙至音容莫識涕對茫然驗七星於子心認雙環於母臂而後深傷頓感若墜谷

而騰

集作登

天蘊怨都除類愈矇而覩日於是盡歡兩媪

兼敬三人均養之恩咸不寐於十起反哺之志齊色難

於一堂羣公賀虞潭之親天子歎馮勤之母此復然矣

內侍事主四朝歷官七政專良恭肅著美綸言溫

集作中

謙儉讓得名朝列享年六十有四開元十二年終於來

庭里明年五月葬于

集作於

長樂原繼子力士喪孺慕而

加等葬罄誠而備物義方之經鬱為稱首孝德之傳今

見其人永惟先恩追綴餘烈若夫慈羈旅之稚童仁也

約詩禮之尊教義也貴不居而要避權禮也生推心而
死有託信也仁為德本義為行先禮為身宅信為意田
故仁之報也壽義之報也樂禮之報也安信之報也順
履順居安乘樂享壽此四者生人之偉事目牛之深致
者矣於戲領集作賜冠馳寵勢偃蹇俗上煜爚君傍者
豈不思景行高山慎視前轍如或少選亡禮顛沛違仁
瞻言四報咫尺千里揚芳樹淑其不務乎余固春秋之
徒也懲不濫而勸不借義重天綱孝崇仁紀樂諄諄之

誠訓善哀哀之克子不著倚相之書將受邱明之耻九

原之上

集無之字

千目

集作月

深覽俾攀傷知音有以見古史

之心也銘曰

高堂樂未散重壤哀已擗寶帳吹靈衣金尊照塵席苦

長夜之易泯怨寸景之難惜列

集作刻

義聲與孝心萬古

千齡得此石

內給事諫議大夫韋公神道碑 于 肅

衡嶽之峻極于天作鎮五嶺炎海之包括于地委輸百

川以崇山之靈漲溟海之闊孕毓粹氣實生英才厥有
常府君則其人也自豕常開國積德累業西漢丞相父
子繼為醇儒衣冠相襲傳慶不絕得其姓者見重於時
可謂源深派長本大枝茂者矣公諱某京兆人也祖某
不仕父楚皇任朝散大夫內給事中武德使判宮闈令
事皆奕世載德繼美承家公幼有竒操形神爽邁器宇
沈正識者異之髫鬣之年叅內侍省出入門閣情志專
良開元十年解褐授內府局丞典御府之藏列內官之

秩勲愿慎密肅恭矜莊洵美可觀碩大且儼事因績著
官以課遷尋充市舶使至於廣府賅賣納貢寶貝委積
上甚嘉之每宣諭諸道曾無寧歲敷敷詔旨人皆說服
天寶初拜朝議郎判宮闈令知本局事至五年加朝散
大夫內謁者監皇唐六葉道泰時康朝野歡娛禮物備
具公以才藝敏悟頻操員職垂青組之榮綰銀艾之寵
受宣詔命侍衛軒墀顧盼增輝時望歸美尋加朝議大
夫拜內給事中判本官事眷遇愈深品秩優異上方垂

衣致理端冕穆清或侍獵長楊扈遊閑館隨雕輦而稱
警接瓊筵而獻壽排金阼登玉堂請奏密命承傳天憲
公之德形於外可得而言公之美暢於中不可得而知
也懿夫近臣之職其來尚矣位著天象官分周制蓋以
萬乘崇嚴九重深邃出納綸旨陪奉宸居宜有司存委
任親重或導從輿輦或典司禁署凡百千數不可殫論
若非理識端詳幹略稱最者則不得揮翰內省分曹局
司以公之才雅有令問嗚呼蘭蓀方茂秋風敗之以乾

元元年七月二十八日終於私第春秋六十有六皇情軫悼僚執零涕悲夫公歷事兩朝效官三紀其奉上也敬其與人也忠其蒞職也勤其立身也信雖伯子好善史游納忠方之於公彼有慙色夫人宋氏德行溫厚姿容婉淑從夫之貴尋封廣平縣君以至德二年先公而逝乾元二年五月七日合祔於長安縣龍首原禮也嗣子中散大夫守內侍省上柱國賜紫金魚袋守宗次子內侍省內侍伯守堅次子內侍省宮教博士守幹皆克

紹前脩佩服嚴訓永慕蓼莪之痛長懷創鉅之悲揚名
顯親頌德褒美昊天罔極孝莫大焉敬述徽猷書於樂
石銘曰

英英常公山岳粹氣植性敏達存誠忠懿應物之材荆
鍾之利踐言履信依仁守義五登秩序三掌職司便蕃
省闈密勿軒墀進退容止周旋羽儀壯圖未展遷壑纏
悲鳳城之側龍首之陽墳生宿草魂闕連岡逝川兮茫
茫隴樹兮蒼蒼勒銘兮貞石千古兮傳芳

內侍陳忠盛神道碑

裴士淹

夫北辰垂象南面居尊紫禁

一作殿

崇嚴彤庭奧密靜言

近侍允屬能賢其誰見稱則有我陳府君矣公諱忠盛

字懷泰潁川許昌人也其先出自帝舜至遏父為周陶

正受封于陳子孫因以為氏粵若尚書孝德頒賜聞乎

題劍太守高義禮賢為之下榻代襲賢貞門承軒冕因

從官京邑今遂家于長安曾祖

闕

正議大夫內給事

祖守節正議大夫內常侍父文叔銀青光祿大夫內常

侍或肅或又克寬克仁好古而探墳籍懋官而紆青紫

公幼懷端慤夙著嘉聞飾

一作肅

躬以筮仕服勤以成業

先天歲解褐補內侍省掖庭局監尋轉內僕丞內僕令
秩滿遷內侍伯內謁者監加朝散大夫恪居官次夙夜
惟寅爰被丹霄之澤載延朱紱之慶典新樂之絲桐名
與公偕勤亦至矣騁高衢而方遠何景命而不融以天
寶十三年五月二日遘疾薨於輔興里之私第春秋六
十有五惟公黃中多可素履居貞宅心知訓執事有恪

至若怡神以全道體命以適時義以拯物禮以從政故能奉絲言而無失馳驛騎而有光俄拜內給事內常侍尋除朝議大夫守內侍秩序斯崇恩華轉茂位益高而心益下德逾邁而氣逾和且以幹能尤膺任寄前後奉使者十有三焉至乃夢三清於太極之府是脩功德志五樂於無何之鄉式瞻神異崇茲真廟獲彼靈符邁侯甸而訪仙經歷名山而隨羽客然後稽少陽之必舉懷令圖而允臧豈惟藝足侍書材優叅乘巷伯刺讒之什

史游忠益之規固可謂無競維人溫恭淑慎者已以其
年閏十一月九日葬於長安縣承平鄉之南夫人上谷
縣君成氏四德無虧三從罔徙一作失先天十四年正月

二十九日後君而亡以乾元三年五月七日合葬于舊

阡一作塋禮也長子仙鶴昭武校尉左衛豐浩府折衝次

子仙鳳振威校尉行右金吾衛左中候仙甫才惟轉達
職在春官今上御極釋褐特賜銀章朱紱拜內謁者監
仙賢仙管等太邱父子荀氏弟兄事國以忠奉先惟孝

感寒泉而增慕卜幽宅而罔艱懼遷陵谷式揚碑版銘

曰

帝舜洪胄胡公令名三恪惟甫八代至成本仁祖義國

史家聲椒聊之實莫我與京其一懿範彌昌宏材並振果

行育德履信思順執心有恒改過不悛政符省括理必

遊刃其二陟遐自邇休有烈光翻飛省闈翊侍巖廊導宣

國命輝耀銀鐙丹誠每竭朱紱斯皇其三乘遽周流奚往

非適瑞徵桃塞藥獻梁益新廟真容名山靈跡爰典樂

正奚稽市籍

其四

昊穹不愆殲我惟賢四星猶列一德空

傳慘風雲於故里樹松檟於新阡載刊乎貞石永賁於

幽泉

其五

內寺省內常寺孫常楷神道碑 于 卨

易之繫云君子之道或出或處其出也為國蓋臣銘勲
彝鼎其處也保家燕居谷神齊物蓋卷舒在我不違其
正而已今得之於孫常侍歟公姓孫氏諱常楷京兆涇
陽人也有魁岸之姿有沈毅之略年甫羈貫而筮仕焉

委質四朝咸著聲績在玄宗朝拔乎羣萃之中始受賞
九層之構兆於此矣在肅宗朝特見寵遇其時襄陽易
帥滑臺命將屬安羯史盜作亂之後兩軍未戢王命或
壅以公有奉使專對之才俾受節鉞將我詔旨襄峴響
風河滑朝宗皆公之力也在代宗朝僕固懷恩擁衆汾
上仍以姦子作亂外邑北窺大鹵之地南侵蒲坂之封
蟻聚鴟張關輔震駭公以單車之使仗節直進誕敷威
德陰携黨與元惡奔潰狡童折首猶以餘衆嘯聚朔陸

公乃通和獯戎俾發義師與郭汾陽等諸軍犄角姦兇
敗績萬國底寧斯又公之勞也前此急宣藩維會計大
務必能盡瘁以奉投艱明明三后稱嘆多矣事今上也
每侍帷幄且曰求舊嘉謀讜詞入陳出秘扈避狄也著
奔問之勤從省方也有執羈之效逮法駕還宮特加褒
獎斯又公之忠也其後晦明生疾屢在長告是能閉朱
門蔽華屋不屑塵事隱几頤神維清淨為師維友愛是
篤物我俱喪不知老之將至云爾本其族姓則春秋時

在衛世卿三國時有吳稱帝晉魏而下代生明哲至大
父孝廉擢第烈考庭玉右金吾衛中候贈兗州刺史或
高上不仕或大用靡臻第其揚歷則四進散官正遷近
職釋褐內侍伯遷文林郎內謁者監賜緋魚袋轉朝議
郎內給事上柱國特加朝散大夫更名常楷擢授內常
侍脩功德夫積善之家其後必大故長兄嘉賓黃州別
駕贈大理少卿仲兄知古故開府儀同三司魏國公公
與開府宣力王家首冠貂璫腰垂銀艾便蕃禁闥炳耀

聯華四紀於茲亦云盛矣貞元五年七月二十三日卒
于廣化里之私第享年六十一明年十二月五日葬于
涇陽縣高平原先塋之側次亡兄之兆蓋不違親而得
族葬之制也夫人魏郡邵氏祔焉用周公之典也初開
府當肅宗朝以直諫忤旨配流費州及代宗踐祚公屢
建勲代密勿之際陳懇友于即日詔追仍復官爵既至
矣特上封章請割衣食之費闕於涇陽縣卜爽塏之地
建立伽藍上報皇慈覆幬之恩次展天屬怙恃之功優

詔嘉許錫名曰寶應衆善計費維憶繫公定是職君子
曰開府創之公能就之豈非忠於國孝於家嗚呼吾見
夫二公報主之心昭矣顯親之道終矣異時歲或大侵
人有菜色公常設粥以食餓殍斯不曰仁乎公植性慈
惠尤深象教靡茹葷血務施緇徒斯不曰善乎故歸全
之日恍如先知乃召羣子載授理命尸坐自若奄然而
終談者以為報施明徵矣有子良祜朝議郎前行原王
府錄事叅軍上柱國賜緋魚袋克奉前脩雅有令問進

可事國退可幹家先公而亡矣猶子正議大夫行彭王
府諮議系朝議大夫內侍省內給事上柱國充慶州監
軍榮義朝議郎行內典引上柱國僧法律等奉引進之
恩深泣血之感窅窅哀送必處必信以邵嘗備史官見
託銘述蓋春秋褒善之義敢不承之銘曰

兵諫雖忠不可以訓賦詩對心

一作而

亦奚足狗猗哉孫

公不緇不磷以道而退以禮而進撫實去華履剛能順
策名四后克昭忠蓋宣諭反側以安觀釁悖叛是殘廼

和獫狁迺復天倫忠焉孝焉家邦必聞移病歸體從吾
所尚道心中接塵世祿積喪之歸真不嬰無妄高平之
原于以卜葬後人與歸觀銘是諒

內侍省內侍焦希望神道碑 吳通徵

春秋以立功於時謂之不朽釋氏以不住於相至乎無
生善時者勲業存離相者往來一以是居世其至人之
蘊耶維夫事上以忠脩身以道竭節於盛明之代遺情
於寵祿之間通乎大觀與物始終建先脩之所為順理

之期光昭前聞有若左神威軍中護軍焦公兼柱國公
名希望字舊史稱周武王克殷紂封神農之後於焦至
武王孫康王生子曰文手中有畫如焦字之數又以封
焉爰初啟土實居陝服衆國入于焦因從平陽遂命為
氏其間允文允武或哲或謀代不乏賢可得而略厥後
成以官族寓籍于京兆府之涇陽公之系緒今縣人也
曾祖諱躍太宗撥亂常從征遼拜絳州鳳庭府果毅都
尉祖諱法滿克踐儒行累遷至朝散大夫絳州司馬皇

考諱孝景佩服仁義不交世祿積德之慶鍾美於公公
疑靈純粹秉志剛實耿介不羣風標自遠清襟朗察萬
象無所隱其情見性圓明衆辨不得礙其正以言則窮
其奧得聖人之心以行則用其中合君子之度年及弱
冠選侍彤闈貞松之姿既呈於徑寸層臺之峻亦資於
覆簣守內府局同正丞以陝府元從授承務郎敬恭朝
夕恪守官次忠信以奉上之道禮義以周身之方莊而
能和敏而有勇故可以恭武可以佐文方圓適器無入

而不自得今皇帝之在春宮每加信任泊正宸極爰獎
真純於是朱紱斯皇銀章有耀公夙荷榮渥茂茲寵光
便蕃左右密勿軒陞事君不二志守職惟一心口無擇
言身無悔行見義能勇盡力忘勞其衛主也有匪躬之
節鑿與既復上懿其誠除給事同正賜金印紫綬益見
親重乃命監射生軍事貞元五年詔以射生軍為神威
軍加內常侍同正兼謁者監賜上柱國餘如故公訓整
戎務練達武經舉傑雋懋勲賞贍財用協師徒我車既

堅我馬斯服至若郊廟之事文衛之儀材官毅騎林植
鱗次若離若合者固足以耀皇威而振國容矣十二年
制加中護軍累遷內侍省內侍同正兼內常侍公受委
愈重執心愈恭守直無隱盡忠在公理軍如家正身率
下上所甚信咸感悅之爰廣舊軍肇建新宇叶比衆志
允成厥列布之以署爰峻壁周講藝有館公食有堂既
庶既繁兮樂且康為輪為奩兮耀華章迴六龍之日馭
降萬乘之天光以永代垂則威宣上方者也至乃公離

諸見性符道源以明誠弘大覺之因以清靜脩有為之
事動靜無闕喧寂一如不牽外緣不滯禪想以之則貞
固幹事仁者悅其仁義者服其義嘗事上則忠信行已
以蒞職謂無上法寶諸佛之心自達摩東來實為教祖
公了見真性玄契度門乃於軍士建立精舍上以奉國
下以利人皇上御大明以燭幽發惠日以垂照廣一乘之
妙旨輔萬物之自然及公上奏乃賜額曰真元達摩傳
法之院表正知也每從容而嘆曰性無生滅物有始終

本乎天者為昭明親乎地者為委順是以遺生死外形骸感冬夜之詩歸於其室備歲時之制允叶前經信所謂知命不憂達生之情者矣乃建先脩塔於涇陽縣之東南焦劉渡之西公之故夫人李氏浮圖域中龜謀協

從鷹

集作雁

影連屬支提鬱起像法恒存吾將老焉可以

無累經言諸相常寂公之志歟嗣子朝榮等克稟趨庭之訓無虧立身之道以是有後人咸曰休哉惟公之內誠既率乎天至公之玄達載光乎法器宜乎承睿賡協

師貞紀嘉績茂休聲保黃中之元吉惕塵外之高情既
得瑕丘之地先開張禹之塋仁之報兮壽未極櫨可材
兮躬所植表全美於真珉俾後生而作則銘曰

萬物芸芸孰見其真修心踐言實惟哲人猗歟護軍與
道為隣率性居正資忠事君澄心止水勵節貞筠行有
枝葉道無緇磷其動以直克廣厥勲及新營宇載肅鉤
陳衆服其誠上嘉其勤朝章允集睿睠逾殷處貴尚謙
秉志惟純清虛應物恬曠怡神法本無生有非吾身靜觀

其復視喪猶塵委順于何涇川之津鴈塔先啟區中了
人爰植爰脩以躬以親洪流不竭法壽長春表石垂芳
千年日新

文苑英華卷九百三十一

欽定四庫全書

文苑英華卷九百三十二

宋 李昉等 編

宦官下

內侍彭獻忠碑一首

內侍仇士良碑一首

內侍護軍中尉彭獻忠神道碑 張仲素

弘璧之在御府也韞連城之價所以為寶景雲之見慶
霄也麗捧日之彩所以為瑞大臣之居崇列也處近君

之任所以為貴况復侍軒墀之密地護禁衛之雄軍昭彰茂功回復介祉終始一德永垂清名者哉侯誰能之見於彭公矣公諱獻忠字琦夫彭為商諸侯以國表姓至漢大司馬宣有遠績盛烈書於班史至孫業避漢末之亂寓居隴西襄武縣因地方望傳諸歷代隴中隴上推為右族派緒綿遠冠蓋蟬聯責任漸繁乃附咸鎬今為京兆三原人也烈考諱令俊皇朝儀郎行內侍省內謁者監保安福履弘闡義訓鍾慶濟美傳於蓋臣公善

下寬中蹈方守直竹箭有筠而可比城府無迹而自深
以虔肅恭懿承大君以仁孝清儉績前烈建中三年入
侍宮殿德宗皇帝嘉其敏厚器任異等便蕃於帷扆之
內承奉於指顧之間言必有章動皆由禮貞元三年授
內府局丞四年授內謁者監七年授朝散大夫清階命
服所以馭貴白珪無玷赤紱斯皇自天之渥澤方深漸
陸之羽儀始就十一年授朝請大夫周旋密勿獻納端
亮孔光問樹而不对石慶數馬而後言以公方之今古

何遠十六年特加金紫所以懋其勤而昭其美也二十
年加正議大夫內侍省內侍仍賜上柱國充教坊使位
愈高而接物愈敬恩益厚而處躬益卑故能行與福隨
動將吉會當德宗仙馭上升順宗宅憂諒闇公以貞固
服勞之節宣承衛翊戴之忠嘉績悃誠可書竹帛皇上
御極拱侍穆清疇其功庸䟽以爵土元和元年封襄武
縣開國男食邑三百戶充飛龍使二年加忠武將軍右
武衛將軍三年授左神策軍副使加雲麾將軍馭衆之

才著于侔

一作粹

理賜祭戟戶耀其高門所以旌其勲表

其貴也其年奉詔充淄青道宣慰使六年遷知內侍省

事充弓箭庫使六年充惠昭太子監護使祇事既畢加

冠軍大將軍至十月遷左領軍衛大將軍知內侍省事

充左神策軍護軍中郎將兼左街功德使十二年春以

勤瘁遘疾上章請告宸睠屬賴令卧護陳讓懇切累至

再三動于天心方始得謝二月乙巳薨于翊善里之私

第享年五十二聖皇軫悼輟膳興歎追念勲舊賻祿加

等贈開府儀同三司左武衛上將軍所以錄其勞而飾其終也官司職喪僚吏襄事卜兆窆窆圖其永安以十月十四日塋于萬年縣鳳棲原祔從先域之松楸禮也惟公爰自弱冠暨于知命奉職三朝殫竭一心掌繁領重樹勲宣力澡濯仁義發揮心靈斯所謂奉上之心閨門就養承順著聞及丁艱棘勺飲不進毀瘠過禮宗族感傷斯所謂因心之孝踐歷禁省榮耀貂璫冠軍護戎在帝左右飲水持操盥水潔身侈泰是懲燠灼自息

寘與道契儉而全貞生不務於家為歿仍規其薄葬斯
所謂立志之本探賸精微講貫學藝周勃引強之能有
而不恃孫武用奇之術知而罕論斯所謂遊藝之方綜
事呈才仰奉睿旨允釐樂府韶夏是司演懈谷之正聲
絕齊竽之濫吹解署增輝絲桐載和去而借留上叶宸
聽既臨馬政一日必脩用奚官訓一作駟騶之法整穆王
八駿馬阜及董武庫程範庶工弦木砥金因不犀利斯
所謂蒞官之敬嘗馳星軺撫慰充海鄆岱之域風宣露

濡戎臣列校蹈舞感抃斯所謂御命之功萬旅雲屯屹
為親衛加拜中尉統茲六年夜護繚垣曉趨丹陛陰助
神武制外自中獎善任材動必詢眾廣脩廩庾贍食熊
羶符伍有倫禮樂是閱咸使夫既勇且毅並務於移孝
為忠至於別部支兵邊陲縣內拊循訓整不犯秋毫聞
公之歿如喪親戚斯所謂護軍之畧宜其享之遐福錫
以永年蒼蒼難諶不至者壽夫人長樂郡君馮氏端懿
柔明慈和婉孌一作慙母儀婦德淑慎是彰自晝哭之惟

凶乃明心而習靜落髮壞服從哀節空元和十二年三月十五日出家受戒特勅正度仍錫法名正智賜居義陽寺所以遂弘誓而資幽福也嗣子希倩次子給事郎行內侍省奚官局丞員外置同正員希昭次子正議大夫行內侍省員外置同正員上柱國賜紫金魚袋希貞次子正議大夫內侍省內侍員外置同正員上柱國賜紫金魚袋希成次子希冕次子希慶芝蘭滿庭組綬相映荼蓼茹戚縗麻儼然哭泣之哀慕深先遠蒸夷之紀

思烈舊勲樂樂貴臣匍匐上請詞臣奉詔傳信揚芳焯
敘德善永垂琬琰銘曰帝在法宮下臨八荒外倚輔弼
內憑忠良奕奕彭公蘊義含章左右軒陛言端行方夙
夜孔勤貌貅是職丹霄侍從黃道引翼深承寵渥克茂
勲力寒玉侔清朱絲表直厚德多恕明誠不回決雲利
器構厦長材北落謝疾東榮報哀恩加法賻官贈儀台
祖載之辰清川曉涉淒鏘笳挽搖曳旌靈新阡舊城龜
從筮協原即鳳棲封如馬鬣紹績之馨子貴家榮繼孝

嗣恪宣功保名纂篆金石琢磨堅貞用播徽烈將來作程

內侍省監楚國公仇士良神道碑 鄭 薰

運巨壑者必資帆檝之便以鼓其波濤築廣廈者必堅

柱石之材以完其結構

一作棟宇

是故明王聖帝立國保家

莫不求竭忠宣力之臣配帆檝柱石之用懋崇基業弘

濟艱難百代通規千載相遇孰稱全德其故開府儀同

三司內侍監致仕楚國仇公乎公諱士良字匡美海豐

興寧人也宋大夫牧以忠烈正直書於春秋公實其裔

馬其後香以文雅仕於東漢儒以議論貴乎北燕蟬聯
珪晃暉映簡冊代著奇節率多令人史編家譜一二詳
焉顯公之曾考皇朝正議大夫內給事賜緋魚袋諱上
客府君忠昭事任績茂聲猷躬行正途克嗣先業烈祖
皇朝議大夫內常侍賜紫金魚袋諱奉詮府君名以才
彰功由道著王氏教讓義之已行于公高門定國方大
皇考諱文晟府君精持貞廉高挹塵俗位以命屈慶因
善餘厥惟楚公克振勲德追贈特進左監門衛將軍賜

紫金魚袋申公之誠孝也公年未弱冠入仕東朝是時
憲宗皇帝主器承華體元儲兩親奉再飯共歡九齡助
登少海之瀾更闡前星之耀永貞十年授掖庭局宮教
博士賜緋魚袋元和初以舊恩本固新渥彌隆既頒侍
從之勤首舉寵遷之命加宣徽供奉官賜紫金魚袋檢
身極敬奉輦施勞勵自牧於撝謙表無私於應對閨六
月轉朝散大夫內侍省內給事宣徽供奉官如故材力
彰於省局周旋美於禁闈驟議甄升更加命秩冬十月

拜內常侍餘如故未周星紀三歷顯途既洽謳謠且明

恩澤彼虞卿再見為趙上卿荀爽九旬登漢三事允膺

時議彼或多慙三年以本官充內外五坊使尋或疑遷

宣徽供奉官發彼五豨輔騶虞之仁化殫此大兕詠吉

日於春蒐外撫一作按之暴橫自銷中綏一作野之井閭知感

十年加大中大夫內侍省內常侍尋以本官充平盧軍

監軍使金齊舊壤繼代邀恩甲兵甚充貢賦不入公聞

其叛渙諭以忠貞爰革非心幾至效順明年詔徵又以内

侍依前宣徽供奉官吳冠據淮天兵在野逗留不進沮
敗為憂揀求使臣往諭中旨遂命公以本官及職充淮
西行營宣慰使至則大布皇澤益勵軍威四遠瞻風萬
夫振氣而又盡得機要既還奏聞竟至成功斯為顯效
十五年遷雲麾將軍右監門衛將軍充內外五坊使仍
賜上柱國又進封南安縣開國男食邑三百戶驅獸而
無害五穀充庖而有事三田蕙圃蘭塘落飛駐走助開
三面之網勤施一目之羅鄙長楊之大誇胡人笑上林

之務矜楚使條令既肅巡遊盡歡其冬復加冠軍大將軍長慶初罷五坊使以本縣進封開國子尋進侯爵食邑一千戶宣徽供奉官皆如故二年除鳳翔監軍使又進封開國公食邑一千五百戶曾父舊疆繆公遺政郡邑則武安留守扶風則馬謨擅名雜於版屋之郊號為難治之俗公攬轡即路下車撫戎三軍畏威百姓懷惠寶曆二年徵一無此字復為宣徽供奉官以本爵進封郡公食邑二千戶尋除鄂岳監軍使傍連荆楚南接湖湘閭

閩皆土著之安貨貝有山積之富兵不堅利人皆惰游
公深贊訓齊同為勗勉知方有勇自我而能鼓疑大和
元年入為宣徽供奉官轉內坊典內侍省秩清事簡優
逸自娛莫展長材鬱于群論俄拜右神策軍副使公於
是端肅以貳戎政廉讓以播軍聲屏衛益嚴暴悍知禁
二年擢為右領軍衛將軍內外五坊使講事一時農不
易隴選徒百隊人不告勞鮮扁而布青林行事而無遺
袞一無此
十二字 龜繡古法兔獮新規指顧之間莫非盡善六

年真拜內侍知省事餘如故明年轉大行庫領染坊依
前知省事恩澤浹於寰瀛寵錫周於藩服綺羅萬段錦
綉千箱每極珍華曾無濫惡又玄黃朱紫染彩文章靡
不精鮮悉中程度以賞能陟于龍飛使本官並仍舊御
閑二六大驥三千異骨峯生深溝洫溢親習盡馳驅之
妙羣分多駟駿之奇芻秣尤精藁粘常美九年五月拜
左神策軍中尉兼左街功德使將軍知省事如故練達
戎機恣親護禁典理爪牙之衛左右心膂之師寬不喪

威簡不曠務氣勵熊羆之勇手持虎豹之韜恩由忠深
士以誠感張孺駭乘孝宣乃安趙喜宿衛顯宗加厚轉
左驍衛將軍餘如故既而鄭注挺妖李訓附會列奏偽
瑞固邀鑿輿圖害腹心漸逞姦毒公先機立斷禁旅遽
齊坐遏兇渠保護帝輦指名魁首倣頃追擒其餘躁
競進取之徒枝連葉著之黨或志諧狂計因自正身或
跡比頑童居然就禍莫不盡苞恢網同抵國章由是宗
社乂寧中外協睦非夫忠謀天假廣業神通其孰能如

此乎及於廟堂議功公在第一優詔特進本衛上將軍
中尉知省事如故位輕於德賞不配勲難許冲謙終昇
峻級尋遷驃騎大將軍開成五年加開府儀同三司左
衛上將軍封楚國公食邑二千戶食實封二千戶頒恩
常例非私受也會昌元年又加食實封二百戶尋擢為
觀軍容使兼統左右三軍獎舊常議昭異渥也公每念
禍伏福中祿為身累將持盈滿莫過退休三年夏以寒
暑內外針鑿罕效因求散秩用遂素懷乃除內侍監將

軍知省事如故尋又連表陳讓固辭恩榮優詔以本官致仕其年六月二十三日薨于廣化里之私第享年六十有三嗚呼身隨運往名寄勲留一代推雄九原表傑天子悼之罷朝兩日贈揚州大都督公弱冠以辨智取位強仕以幹蠱居官及蒞大政以機畧致勲勞臻于貴壽以恬退保終始事在簡冊爵及天人出入七朝顯揚三紀秩以功藝進道由忠直張擊鞠廣場則馳先百馬彎弧迥野則飛落雙雕故得侍娛遊則三領五坊承顧

問則八加供奉元和中盧從史倚上黨兵勁陰結叛臣
憲宗皇帝命護軍中尉吐突公統戎專征密勿神算誘
至幕下縛送闕廷是時公適在軍助成丕績其或揚鑿
宣命電掃雷驚每播深恩親當橫陣兩河平殄頗預其
功雖不一作非是自矜實傳衆口而多材多藝強記博聞舉
策畫若應神明閱簿書無逃心目而又精鑒冠絕當時
門館賓僚薦延功行必求明德用輔聖朝則有秉忠正
之心荷匡贊之任才表王佐出為國禎康濟羣生輝華

四海者矣然後知衛將軍七擊匈奴封侯九國霍驃騎
六征絕塞列將八人特美高勲豈膺賢弼以今方古我
德為優以四年正一作六月二十三日歸葬於萬年縣寧

安鄉鳳棲原社李村夫人安定胡氏祔焉禮也夫人故
開府儀同三司檢校太子賓客兼御史大夫贈戶部尚
書承恩之女性得天才儀標冠族叶組紉之懿範彰圖
史之貞規法度所以正家柔閒所以遵道洎祥開鳳兆
德協鵲巢芳徽溢於閨闈淑則洽於姻族以公勲位峻重

累封至魯國夫人壬戌歲先公而歿有男五人長宣徽使銀青光祿大夫行內侍省內給事賜紫金魚袋曰從廣次光祿大夫檢校散騎常侍持節曹州諸軍事守曹州刺史兼御史中丞上柱國南安縣開國公食邑一千五百戶曰亢宗次閣門使朝散大夫行內侍省內府局丞賜緋魚袋曰從源次邠寧監軍使中散大夫行內侍省內侍局丞賜緋魚袋曰從渭幼曰從湏皆稟訓過庭早通詩禮承恩入仕共效忠勤為明庭之羽翰作私室之

符瑞不忘素業自致青雲宜乎懿德有後信不誣矣
大中紀號五年克平四裔東南款化西北開疆三耀舒
光八紘無事皇帝念功軫慮錄舊申恩惟楚公永貞時
祖宮有翼戴之勞元和時宣徽有委遇之渥今則已悲
封樹未刻松銘乃命舉其殊庸勒在貞石用傳不朽昭
示將來特詔詞臣俾其選述臣薰恐惶直叙不敢虛美
謹為銘曰

仇氏之先本宋大夫就義輕死昭于冊書厥後聞人漢

香燕孺乃生楚公前修不渝

其一

焯焯楚公俊又邁德克

抱才器必循典則天資忠孝神助正直高揭勲名幾推

姦匿

其二

從史負力潛通鎮郊上將受詔縛歸天朝楚公

佐成衆不敢搖東國大定塵氣自消

其三

蔡寇不庭誅行

原野羣校傷敗師無進者楚國銜命汗血波瀉貔貅鼓

氣城壘連下

其四

注訓勃戾妖凌北宮和鑿在御狂禠來

銜楚公奮臂甲士趨風克殲巨孽乃建殊庸

其五

五坊三

居公畋有節宣徽八入密議攸竭再監戎閫將校感悅

一牧郊垆驩駟負絕

其六

佐佑帝室手提禁師士伍胥附

皇心勿疑持滿先誠居高不危懸車告謝彭薛肩隨

其七

駭起截颺哀傳逝水空留洪烈永載青史精爽何之壯
猷已矣京兆開阡壽堂在此

其八

仕承泰運歿偶昌期微

音不泯令嗣銜悲聖念既勤爰斲豐碑事功難究有覲

色絲

其九

川常不移松楸已列玄室雖閒清風靡歇作皇

代之英臣期終吉兮無絕

其十



文苑英華卷九百三十二

欽定四庫全書

集部

文苑英華卷九百三十三至

詳校官庶吉士臣龍廷槐

助教臣常循覆勘

總校官進士臣朱 鈔

校對官助教臣蔡 鎮

謄錄監生臣戴天民

欽定四庫全書

文苑英華卷九百三十三

宋 李昉等 編

婦人上

高安長公主碑一首 涼國長公主碑一首

章懷太子良娣張氏碑一首

鄔國長公主碑一首 昭容上官氏碑一首

延州旦盧使君萬泉縣主薛氏碑一首

高安長公主神道碑

蘇頌

維開元二年龍集攝提格夏五月哉生明高安長公主
薨於長安永平里第享年六十有六嗚呼哀哉丙申上
發哀于暉政門設次舉輟朝加等遣大鴻臚彭城侯
劉知柔持節齎書赴弔京兆尹攝大鴻臚鄧國公張晞
司農少卿李琇有司帥屬護喪文武五品已上會哭書
不云敷族至于九以昭于百姓禮不云敘親居其一以
統於萬人此所以追有虞而化天下感配陳而慟宸極
復以為素旂誅行彤管區風司常罕留執史多紊乃制

銀青光祿大夫行紫微侍郎兼知制誥上柱國許國公
蘇頲為銘刻石臣頲不敏颺言拜命云長公主諱某字
某隴西狄道人高祖神堯皇帝之曾孫太宗文武聖皇
帝之孫高宗天皇大帝之第二女中宗孝和皇帝之姑
疑作妹也太上皇之妹開元神武皇帝之姑也昔軒后修
德高陽任而豫之虞姬邁德伯陽冲而用之故先王會
昌而王者興前聖受命而聖人作自風偃三代刑清百
年揚耿光於祖宗紹期運於神武上以比崇於黃軒至

其道次以宗極於玄老施其教慶漸繇恩周行葦重熙
而累盛皇哉而唐哉公主承弟月之華分女皇之耀閒
和美度婉婉令德有循其禮無擇於言鑒圖取則聞詩
服義故可以賦絲繒而開湯沐者也於是曳紅綬賜青
圭香滿玉鑪綵搖金縷允所謂帝乙歸妹以祉元吉魯
侯主婚是稱同姓始封宣城公主下嫁乎王氏駙馬都
尉故潁州刺史贈右監門將軍太原王府君諱勗字遂
古右監門將軍平舒公之孫歙州司馬之子自周儲洛

濱之契秦將頻陽之業門昌帝緒家累天姻徵平叔之
才貌得孟孫之閱閱亦既覲止展也令儀成其肅雍率
由俊彩至盥漱櫛縱笄總衣紳箴管刀礪線纒鞞裘若
此者敬而持之動必於是則其餘可重也天授中聖后
從權革命駙馬非罪櫻酷公主復歸于後庭九九十甲
子口不入辛味耳不聆曼音體逾尚柔言靡敵怨連觀
心之智察摩頂之神豈寂以幽通將虛而信受有菩薩
現前者數四居每竒之中宗禹物不改漢儀初復乃命

宗正卿李珍冊拜宣城長公主食實封一千戶并置府僚比侯王之封齊令丞之秩太皇御極又增五百戶改封於高安且重永康之冊允符長廣之拜今上握圖又通前加至二千戶尚於德先於親也公主頃歲奉嘗覩高宗畫像雖光靈在天而見似目瞿感咽于地遂成心疾至使命醫萃止御藥相望孝焉而終仁則何輔嗚呼哀哉富貴乃驕奢之資不期而至吉凶乃盛衰之象不召而成况泰忘約吝生動寵怙權邪醜正知得而不

知喪知存而不知亡嘗歷觀之熟矣由是黃金象牙明珠
翠羽之飾積於外雕文刻鏤衣紈履絲之巧充於內然
後堅車良馬漿酒藿肉吹笙竽學歌舞於其間者殊不
知以相強而結禍因自恣而招危魯元所以好過度竇
太所以縱踰禮鄂邑所以懟抵罪湖陽所以匿犯法館
陶所以求不獲昭平所以免河上二字疑埒開邨阜眉子
孰聞田在漢京權臣所奪吁可長嘆息者矣我長公主
則不然避榮守靜退藏於密端操正色進寡其亂為皇

女焉為皇妹焉為皇姑焉非不貴也能戒盈忌滿智崇禮卑儉德之恭讓德之益主無攸遂不專也勤無告勞不匱也宜於秋犢以助宗人率彼春蠶以從王后則未嘗忽諸猶深悟色空大依禪慧觀我生之進退究人事之終始蓋泡夢之為喻也乃散以檀那齋於染着景雲歲請罷賦邑蠲屬官遂沈冥從省曠書上而制為之嗚呼身役意餘道之微者古有女儀嬪則焉或孟母之勸學敬姜之知禮仲妻之辟相惠婦之光夫然出於素俗

書之緹史未有居高益下託體至尊如長主之儔矣故
能九師讓能三子聞教自我之出與時偕行知微知彰
不諂不黷長曰暉銀青光祿大夫大僕少卿仲曰暉朝
請大夫衛尉少卿季曰暉尚舍奉御並欲報罔極藥貌
棘心哀以送之龜從筮吉輿其年八月朔十七日葬于
咸陽之北原禮也落月過半秋陽浸微清笳凝兮朔風
斷丹旄列兮秋雲飛望槐里而西馳去荻園而北顧視
牽牛兮像設過飲龍兮徑度闔闔窳窳遠羸女之樓臺

松柏陰烟近漢皇之陵墓其詞曰

赫赫上帝臨于巨唐卜年萬倍誕睿興王何彼穠矣
休其有光亦既從夫車服不繫亦云主婦蘋蘩以祭在
貴能約終溫且惠樂只君子曾不永年未亡之人歸於
九天心以理遣身以義全光于累聖受于明命伯姊延
暉皇姑襲慶監以損益辭其滿盛我有空言宗于釋
門不生不滅茲道存存允之降靈西反其魂詠清淺兮
天之際憶瀟湘兮日已逝登寒山兮見超忽生秋草兮

坐蕪沒金為字兮琬為碑永貞芳兮實在斯

涼國長公主神道碑

前人

乾坤既分彖象攸配變則成女終於歸妹惟長公主諱
某字某我興家邦天錫宗社昌運及五聖真享鴻名聖
期至六神武膺駿命網緼構極倬彼雲漢的厯垂春華
如桃李順顏承志約禮知節得繭館從蠶之儀採公宮
習史之藝載柔湯沐爰賦井田其創也與多於仙源其
徒也稱長於涼國故丞相虞公太源溫彥博曾孫曦台揆

門闕風流儒雅僉諧是圖歷選伊尚君子至止碩人其
頡協時之吉偕典之實雜珮明璫褰衣錦裳熒熒煌煌

未詳

有芳居迴暎以虹倚動羣超而翠翔媛成肅雍候守

祿位貴則能降降而不驕勞而在勤勤則不匱未嘗有
也皇嘉之而謂曰台知以樂變乎風揮五弦之盡美

觀萬物之從令欲同聽乃親故特

一作特

傳汝公主清揚

神潔妙指心閱猶白雪之詞冥通則應類青溪之曲多
領悟皆賞初榮賜以得後誠盈而散恩過魯元王豈上

邑寵逾賓太常

疑

豈臨山每絕館陶之祈自無昭平之

贖粹溫而敏靜好而詳以北渚之愁苦何西方之聖如

是大脩圓乘深入至空竟而瑤草淪霜桂枝辭月開元

十二載八月辛巳遇疾薨于京邸永嘉里第享年三十

八嗚呼哀哉上徹懸久悼臨次增涕京尹護喪羣司藏

事其年仲冬壬午陪塋于橋陵生資敬愛歿效充奉蕭

史樓中鳳音何望軒轅臺下龍得仍攀子西華等扶杖

而立茹荼以泣赴賓憫默觀者慘容翰林酸嘶又昭乎

遺風雖著縑簡垂厥後代諒憑刊刻豈碑詔立睿禮親
紆捧戴則奔馳四靈光華則迴薄七曜明山可轉况連
於銳盜玄圃惟資重錯於琅玕伴銅鏤之湮沉由寶善
而飛動禮臣不佞敢作銘曰

天其有章銀漢玉潢我則有祥霄明燭光柔祇不忒芳
問允塞何彼穠矣其儀是則鳳凰于飛公子同歸琴瑟
在御德音莫違何沈寥之素秋兮獨杳杳之玄夜何闇
忽之誰忍兮痛明靈之不借清霜晶月楚挽將發流吹

結雲秦聲不聞惟聖皇
今固金石噫長主兮森松柏
榮以悼之兮長不斁

章懷太子良娣張氏神道碑 前人

惟蘭有香惟玉有璋可吉其夢可勞一作榮其弄故臬離

成女祥歸太子之家有震為男業盛天人之邸因以貴
者德其全與我唐章懷太子有良娣曰南陽張氏之子
也邠王守禮之母也初章懷封于雍良娣選以入後章
懷謫于邑良娣隨而邁邠王錫玄社建黃扉良娣坐華

茵驅香輶雖逶迤失於偕老而契濶存乎與成始十四
奉吾夫逮筭年而轉茂終六十四違吾子當卦數而同
極非婉婉淑貞之則含章尚柔之令孰臻於此矣若乃
畫堂清兮羅幕薰匱照耀兮結氛氲杲杲之日英英之
雲蓋良娣之才之美是效是則潔素因捐於篋煒彤益
照於管嫖顏不兢徽範自持處獨藹如顧儔芬若施于
積善覩從梁駟馬之藩貽厥累仁傳相漢七貂之緒隋
上儀同甘泉府別將嚴之曾孫侍御史睦州刺史詳一作

祥之孫朝議郎行貴州都督府始安縣令明之女也層
構鬱起昌瀾遠激去遷南郭儼西鄂之豐碑來應東朝
署西京之戚里不然何謂釐爾女士從以孫子疑袂之
良乎及母儀可宗臣軌伊勵師以儉約戒於盈蕩洛濱
無校除之事涇上無祭美之物衣錦裝裳寧吾所好擊
鐘鼎食唯爾之競俾吾王忠肅恭懿既明且哲志於道
者本於教也粵景龍二載孟夏之月遭疾棄養於京延
康第之寢洎雲景光華春雨自葉睦於我則先受九族

慈於王則每深十起永其錫類衆悅以人禮物朝遣使
臣廷命金紫光祿大夫行鴻臚卿趙承恩銀青光祿大
夫尚書左丞元暕持節冊贈曰章懷皇太子良娣祔于
陵邑禮也嗚呼山疑鶴駕地即烏號太子賓帝之餘高
宗在天之所衣冠道德密近屬於陪乘光表闕瑩殊遠
嫌於好內又典地司空邠王守禮幼承法度長被暉光
九仞之堂咸疑曾氏而逾感萬家之域小韓王之不綱
所以傍彫翠琰代奏丹墀天子孝理之風已周于品物

孝思之德况及於兄弟乃勅禮部尚書蘇頲採詢為言

由是稽舊聞討前訓位不之易祿不之重而莫顧者鄭

勝疑之足稱也信不負之心義不虛事而竟死者越嬪

之可徵也或彰君之隱過或徇已之微直曷如有始有

卒知柔知剛艱虞則持操服勤富貴則竭誠循禮夫詮

一行者尚紀圖書懼疑三從者豈遺刊刻其銘曰

天祚有唐於昭烈光兮土分五色作我藩國兮雷震百

里惟皇元子元子伊何匪淑不娣厥娣伊何終溫且惠

桂宮甲觀之聲迹竹苑平臺之往昔車已折兮我未召
疑鼎其新兮子為王子既王兮我為太殷聖造兮沐嘉
會歲不與兮時迅奔華懷壞兮託寢園闔閭崇於上京
松柏被於長原子哀哀兮篆碑於是親永永兮歿代
如存

鄔國長公主神道碑

張說

臣聞堯有娥英承九族之敷敘舜有霄燭動百里之光
耀大聖之後天必縱之積善之家神所慶矣豈惟上帝

之女雲漢為靈平王之孫肅雍其德連華前志代有其
人皇唐鄔國長公主者睿宗之第七女也母曰崔貴集

國妃構累聖而成門合濟美而為室蘊乾坤之純粹演

日月之清明神媛誕靈常言所絕免懷之歲天奪聖善
不食三日哀比成人文母流胎教之慈曾子得生知之

孝由是宮闈延矚邦國遠聞及乎至筭耀首油駢疑作

右馭錫之美地邑以荆山求之令族嬪于薛氏爾其居

玩圖史動循集作法度服其浣濯恭儉之教興鼓其琴

瑟禮

集作敬

讓之風被其行已也安親惠下之謂仁敬宗

好合之謂義降貴接卑之謂禮恕情周物之謂智推心

而行罔不該備其禮家也視膳饗餼之均和主饋醴醕

之品齊絲竹七音之徽靡纂組九華之褥麗經目所涉

罔不精研

集作莫不精詣

每至三元上賀三日中叅進對詳華

折旋舒婉故以式瞻貴里儀範通門如千花之泛惠風

百卉之涵膏露窈窕之儀克舉繁衍之福大來有男子

四女子五瑤碧生階芝蘭滿室也習禮明詩日漸闈庭

集作
庭闈

之訓銀章艾綬地連恩澤之侯自先朝徹宸之辰

迄公主成笄之日外除過制內疾

集作
疾

餘哀手寫金字

梵經三部躬綉綵線佛像二鋪貝葉真偈現心相於銀
鈎蓮花妙容呈意生於玉指孝思惟則道遠乎哉開

元繼明恩由已進封鄖國長公主食邑一千二百戶

田賦廣而彌儉禮秩尊而益恭其後君子晨歌夫人晝

哀

集作
哭

未亡為稱生意盡矣撫視遺孤將守柏舟之誓

志期剝落永從禁苑之遊朝制斷恩改降鄭氏陵谷可

易其作移隨和之德不昧寒暑有遷松竹其作筠之性如一

均養七子麻廕二宗汾陰之室忘亡榮陽之黨相慶既而善福虛應寢疾彌留盡國之伎遠方畢至供御府之藥中使相望命之必至不可支也堂邑山林忽焉瘁色平陽歌舞適足愁人開元十三年二月庚午薨于河南縣之修業里春秋三十有七震悼紫庭哀傷朱邸傾家若墜舉國同悲有詔光祿卿孟溫禮監護喪葬京兆尹熊延休副馬窀穸之禮一如涼國長公主故事夏四月

恩旨陪葬于橋陵不祔不從古之道也皇上念同氣之
致美感閼川之永謝恨棣華之半缺悲瑤草之先化乃
命國史昭銘懿迹降恩禮於雲露寫哀詞於金石水非
湘渚還起帝子之詞山是洛陽即封天妹之塚銘曰帝
系白雲仙源紫氣漲家成國承天作貴赫赫聖祖曰文
曰武皇皇睿宗一變萬邦挺生淑媛慈和孝恭清臚如
神娥眉無雙邸第立官湯沐建封年集作及笄總禮施
環珮鳴鳳獻祥乘龍擇對帝唐降女天乙歸妹珠玉

過庭蘋藻正內蛟門早聞龍湖忽上無地何載無天何
仰金殿書經華絲綉像欲報之德昊天罔極孰是言歸
良人永違銀鑪烟斷羅幕霜飛懇願毀形託身壞衣不
諒人只改嬪他士稟命曰從從夫集作人曰順息媯繩楚
懷羸霜普反經合權與道同韻燠休二室均歡等潤四
海謚清九族和平萬物向榮衆難未成心戀盛明形隨
落英祖載昇城歸寔集作咸京挽歌駁聲鹵簿凶行哀
哀聖情惻惻同生橋山片石千秋令名

昭容上官氏碑銘

前人

天降時雨山川出雲乃生靈媛祚我聖君精微其道煥
炳其文三光錯行昭容綱紀百揆繁會昭容條理外圖
邦正內諗天子憂在進賢思皇集作求多士忠孝必集作心

感天焉報之吉凶有數卽焉禱之如彼九日昇焉報之
如彼三良秦焉悼之漢宮選材班氏其特楚史書霸樊
妹之力或穆齊公敘明其德嗟爾彤管是鑒是則

延州豆盧使君萬泉縣主薛氏神道碑

前人

或稱達性命者齊生死之域違憂怖者一脩短之數斯

蓋無心之倫耳焉足與議於精哉何則雲虹滅彩集作影

辭人於是詠謠華秀從風君子為之歎息豈不以對仙

麗之景懷變化而遺戀在昭茶集作藥之節悼零落而徧

憤吾見豆盧氏之子於其伉儷有馬縣主諱字姓薛氏

河東汾陰人大父駙馬都尉奉宸將軍諱集作謹確尚城

陽公主考駙馬都尉散騎常侍諱紹尚鎮國太平公主

其在昔也夏有車正先封周有薛侯事長其在今也五

宗姻於帝室

集作里

重葉母於王姬河水經天上積星辰

之氣霍山鎮地下多珠玉之林縣主幼而敏惠長而洵

淑貞孝義烈之傳吉凶賓祭之儀一聞成誦絃絃糾組

之制清毛醞羞之品一見懸解至乃鶴迴清泛蠶聚崩

雲月韻玖

集作玖

砧花穠綵樹婦人能事咸臻妙焉大聖

天后鍊石補天有王母之神器分茅列土啟弄孫之美

邑封田

集作猶

有禮義引而親天授三年四月內封萬泉

縣主天愛下流日新

集作親

上簡乘龍之舉和鳳為難絡

八紘以選門奄千官而求俊夫以龍圖帝寶析步搖之

華源虎戟侯門襲燕京

集作京燕

之雄胄人之信美帝用嘉

焉以萬歲登封元年仲春既望歸於豆盧氏六宮送行

百僚供事迓以鑿輅遺以翟車環珮冕旒璆然在馭黼

藻朱黛爛其盈門詔昏之禮於斯為盛爾乃移其愛敬

以事舅姑伸其友恭以諧公妹舉宗洽比如鼓琴瑟每

至婚姻會同少長咸集圻境節步金翠耀首有婉嫕之

心無驕矜之色晞矇昧者若遲日之泛漣漪瞻詞氣者

猶光風之轉衡薄

集作
蕙

加以引納懷和饋分周賑踈屬

自附窮歸忘窘故蘭行彰信於閨門而蕙風滿行於邦
國諒惟琬琰之性自美抑亦劬勞之訓致焉中宗孝和
皇帝雲迴南土龍見東京二儀更闢九族還敘望我兄
兮公主贊陶鈞之力曰吾甥也縣主開井邑之賦神龍
元年春加實封三百戶縣主既通濟門闌奉御又尚司
殿省天子巡遊宮觀觴樂池臺我有周親無時不從主

家外幸比齊后而聯恩子壻中參與趙王而均禮或醉
飽踰度寒燠未平何嘗不御藥在門王人接路當時厚
澤莫之尚也景龍四年二月以奉御出為丹延二州刺

史保傳下堂隨朱輪集作輜而同去輜駟入郡與阜蓋而

齊飛辭宮闕兮集作而歲闌戀庭闈兮集作而日遠肥泉永

歎邪氣攻衷楚祝招而不來秦醫來而不及景雲元年八
月二十一日傾逝於延州之解舍春秋二十有四美玉
褫顏明珠晦色平陽舊宇遂無望于歸寧懷縣新文空

流連於永逝有子三人西華南容東里等或亂或岐呱
呱而泣天何以罰神其忍之冬十有二月五日歸葬於
長安之洪瀆原窀穸營護有命加等器服祖遣率由舊
章生之也榮葬之也禮若夫柔嘉好治善之元也肅雍
降貴謙之道也山河其德容潤廣也能罷其祥兆允
大也揔衆美於修驕落集作馳嬌暉於小年此所以哀中
之又哀也昔袁亡馬氏蔡筆斯奮鄭喪曹姬潘文亦作
矧茲內範事華無愧砥望夫之石以表靈卹緝幼婦之

辭將傳終古銘曰

薛之皇祖曹軒國禹相陰侯周氏其土宇英英白雲鬱
彼河汾公門蕃衍銘鼎氛氲則仁則義則戚則勳餘慶

介祉誕靈女士中宗之甥鎮國之子皎若集作如霜雪華

如桃李舜族爰敘堯封咸秩萬泉開賦三百其室集作邑

守盛以儉居滿集作冲不溢亦既鳴鴈宜爾家人讓恭下

下撫納親親傾財致客對饁如賓我有邸第前臨黃道
我有池塘却望青草漢輦停暮秦簫拂早歲月易忘歡

娛難保良人出守將命比徂與子偕往飲別東都望母
腸絕辭家淚枯露萎莖草霜酸衆雛魂兮何歸京師

集作

兆之野葬於何處杜陵之下巖巖雙闕列列行櫝勒是

徽音永

集作以

觀來者

文苑英華卷九百三十三